

# Carta Cha Sacuhun Ra Apóstol Pablo Chi Ñáyivi Ñuu Colosas Cha Yihí Cuenda Nyoo

---

**Nu sacuhún ra Pablo noo  
tutu chi ñáyivi ñuu Colosas  
cha yihí cuenda Nyoo**

**1** <sup>1-2</sup>Yuhu ra Pablo cuví noo apóstol ra Jesucristo. Vatyí tyicuan caa cuhva cuñí maa Nyoo. Yuhu chihin ra Timoteo yañi yo, tyaá ndi noo carta ihya chi ndo ñu ñuu Colosas cha yihí vaha cuenda Nyoo ta cuenda ra Cristo. Nyoo Sutu yo nasoco ra chi ndo ta nacuhva ra cha taxi ri coo añima ndo.

**Nu chicán tahvi ra Pablo chaha ñu  
yihí cuenda Nyoo ñuu Colosas**

<sup>3</sup>Tyicuan ri cha chicán tahvi ndi chaha ndo. Ta nacuhvá ndi tyahvi nyoo chi Nyoo Sutu Sutu Mañi yo Jesucristo cha cuenda ndo. <sup>4</sup>Vatyí ñihí ndi tuhun vatyí chinó xaan iñi ndo chi ra Cristo Jesús. Ta cuñí xaan ndo chi tandihí ñu cha yihí cuenda ra. <sup>5</sup>Tyicuan caa sacuví ndo vatyí chitó vaha ndo vatyí cucoo ndo chihin Nyoo nya andivi. Nya quivi chiñi ndo tuhun Nyoo cha ndicha vaha, quihí iñi ndo vatyí

sacacú ra Cristo añima ndo. <sup>6</sup>Ta suri maa tuhun ra Cristo cha cahan ra Epafras chihin ndo, ican cuan chityá tandihí ri ityi tari chityá tucu nu canyicú ndo. Ta cuaha ñáyivi nacuhvá cuenda ñu chi ñu chi Nyoo, tari nacuhva cuenda nyoho chi ndo ñandihí. Ta cuhva cha chiñi ndo tuhun ra Cristo, ta chito ndo vatyí ndicha vaha cha cuñí Nyoo chi yo. <sup>7</sup>Ican ihya sañaha yañi yo ra Epafras chi ndo. Vatyí iin ri tuhun Nyoo sahá tyiño ndi chihin ra. Ta ican ra cuví ra sacuví tyiño nuu ra Cristo cha cuenda ndo. <sup>8</sup>Maa ra sacoto tuhun ndo chi ndi, vatyí cuñí xaan ndo chi tahan ndo. Vatyí maa Tatyí li Nyoo chahá cha vaha coo añima ndo.

<sup>9</sup>Yucuan chaha nyacua nya quivi chito ndi tuhun ndo ta ña sandihí ndi tuhun cha nacuatú ndi chaha ndo. Ta chicán ndi chi Nyoo nacuhva ra cha chiñi tuñi ra chi ndo cha cuenda Tatyí li ra. Ta cuacutuñi iñi ndo tacuhva coto vaha ndo ñáá ndihí cha cuñí Nyoo tyi sacuví ndo. <sup>10</sup>Tyicuan caa ta cuví coo ndo tari cuhva tahán chi

coo ñu yihí cuenda Nyoo. Ta na sacuvi ndo tari cuhva cuñí maa ra. Tacuhva sacuvi ndo tandihí nuu cha vaha ta cohon nuu vaha ca ndo chi ra. <sup>11</sup>Ta chicán tucu ndi vatyí na sandunye ca ra chi ndo chihin tunyee iñi cahnu ra vatyí cuví cunye ndo tandihí cuii chihin cha cama iñi ndo. <sup>12</sup>Ta chihin cha sii cuñí ndo, ta nacuhvá ndo tyahvi nyoo chi Nyoo Sutu yo, vatyí chahá ra cha coo ndo noo ñayiví chaa. Vatyí natavá ra chi ndo nu quiñi caa, ta nanyitá ndo nu ndichin nu nyacá ñaha ra chi tandihí ñu yihí cuenda ra. Ta cuhva ra tandihí cha vaha cha tahán chi chi ñu yihí cuenda ra. <sup>13</sup>Nyoo tavá ra chi yo nu ñaa iñi ta nacuhva cuenda ra chi yo chi ra Cristo vatyí cunyaca ñaha ra chi yo. Vatyí ican ra Cristo cuví Sehe Nyoo. Ta cuñí xaan Nyoo chi ra. <sup>14</sup>Nasatá Nyoo chi yo chihin niñi ra Cristo ta sahá ra tucahnu iñi cuatyí yo.

**Nduvahá iyó yo chihin Nyoo  
cha cuenda cha chihí ra  
Cristo cha catyí cuatyí yo**

<sup>15</sup>Nyoo, ña nyehé yo chi ra. Soco nanduví ra ñáyiví tacuhva cuví cohon nuu yo chi ra. Ta ican ra cuví Cristo Sehe Nyoo. Nya ta ni cumañi ca chino ñayiví ta cha iyó maa ra Cristo. <sup>16</sup>Ta Nyoo chahá ra tyi savahá maa ra Cristo tandihí cha iyo andiví ta siqui ñuhu ñayiví. Ta savahá ra cha cuví nyehe yo ta cha ña cuví nyehe yo. Savahá ra ángel. Ta savahá ra chi ra ña vaha ta chi tatyí ña vaha ñandihí. Ta tandihí cha nyacá ñaha siqui ñuhu ñayiví ihya, maa ra savahá. Ta

tandihí ihya chino chi tacuhva cotyiño ra yoso cuhva cuñí maa ra. <sup>17</sup>Ra Cristo cha iyó maa ra nya ta ni cumañi coo tandihí maa cha iyó. Ta tyicuan ri chahá ra cha conyito tandihí maa cha savahá ra. <sup>18</sup>Ta maa yo cha yihí yo cuenda ra Cristo, iin ri cuví yo chihin ra. Cuví yo coño ñuhu ra. Ta maa ra Cristo, cuví xiñi yo, vatyí maa ra cuvi nuu chi yo. Ta ican ra cuví cha nandoto cha xihna ca. Yucuan chaha cuví ra nuu chi tandihí cha iyó. <sup>19</sup>Vatyí maa Nyoo cuñí ra tyi coo tandihí tunyee iñi ra chi ra Cristo. <sup>20</sup>Ta cuñí tucu ra vatyí cha cuenda ra Cristo ta nicoó vaha tandihí cha iyó chihin ra. Yucuan chaha chahá Nyoo cha chihí ra Cristo. Ta chatí niñi ra nu cruzi. Vatyí cuñí ra cha nicoó vaha tandihí cha iyó siqui ñuhu ñayiví ta andiví chihin ra.

<sup>21</sup>Ta nu quichí chi, xaan cuví iñi ndo chi Nyoo cuhva cha chicá xiñi ndo cha cuenda cha ña vaha cha chinyacuví ndo. <sup>22</sup>Soco Nyoo sanicoo vaha ra chi ndo chihin ra vatyí tachí ra chi Sehe ra, ra Cristo vatyí quichí cuvi ra nu cruzi. Ta nyehe ra tindoho chihin coño ñuhu ra ta chihí ra, tacuhva vatyí cuhva cuenda ra chi ndo chi Nyoo, soco ñahri ca cuatyí ndo. <sup>23</sup>Yucuan chaha cuñí chi vatyí sañihí ca ndo chinó iñi ndo. Ta ma sandihí ndo cha yihí iñi ndo tuhun ra Cristo cha chihí ndo tyi cusacacu ra añima ndo. Ican tuhun ihya, cuví cha cacahán ra nicacahnu ñayiví. Ta sacuvi Nyoo vatyí yuhu ra Pablo tyinyeí cahín tuhun ihya chihin ñayiví.

**Nu catyí ra Pablo vatyí nyaá  
siquí ra cha sañahá ra tuhun ra  
Cristo tandihí ri vehe ñuhu**

<sup>24</sup>Vityin cusii cuñí cha cuenda cha nyehí tindoho chihin coño ñuhi cha catyí ndo. Vatyí cha tyicuan caa sacañá tahn tindoho cha nyehe ca ra Cristo cha cuenda yo cha cuví yo coño ñuhu ra. <sup>25</sup>Yuhu cuví noo ra cahán tuhun ra Cristo vatyí tyicuan caa tyinyeí chi tandihí ñu yihí cuenda ra. Vatyí maa Nyoo catyí ra vatyí cahin tandihí tuhun ra cha cuenda cha vaha chi ndo. <sup>26</sup>Sañahí tuhun cha ñohó xehe nya ta tyembu chahnu, nya ta ni cumañi ca chino ñayivi. Nyoo chicumi xehe ra. Soco vityin cuñí ra cha coto tandihí cuii maa ñu yihí cuenda ra. <sup>27</sup>Ta chi ñu cha ñima ñu Israel cuví tari nyoho, cuñí Nyoo sacotó ra noo tuhun vaha xaan, noo tuhun xehe chi ndo. Ta tuhun xehe cuan ican cuví ihya, vatyí ra Cristo ñohó ra añima ndo cha yihí ndo cuenda ra. Ta cha cuenda maa ra cuñihi ndo gloria nu cunyaa yo chihin Nyoo.

<sup>28</sup>Tuhun maa ra Cristo cahán ndi. Ta chahá ndi tuhun chi tandihí ñáyivi. Ta sañahá ndi chi ñu tandihí cha chiñi tuñi, tacuhva cuahnu ñu ta nyacua nya cha ñahri ca cumañi chi ñu cha ñin ri cuví ñu chihin ra Cristo. <sup>29</sup>Yucuan chaha tyi níí ñiñi sahá tyiñe chihin tunyee ñiñi ra Cristo ta ñihi xaan chotyíño tunyee ñiñi cuan chii.

**2** Vatyí cuñí cha coto ndo vatyí chicá xiñi cha cuenda ndo. Ta chicán tahvi xain cha cuenda tandihí ndo ta cha cuenda ñu

Laodicea, ta tandihí inga ñu cha ta nyehe ca chii. <sup>2</sup>Chiquén chi Nyoo na cunii ca ñiñi ndo, ta cu ñin ri ndo chihin cha cuñí ndo chi tahan ndo. Ta cutuñi vaha ca ñiñi ndo yoso caa cohon nuu ca ndo chi ra Cristo. Vatyí ican ra cuví tuhun cumi xehe Nyoo ta cha naha. Soco vityin sacotó ra chi yo tuhun ihya. <sup>3</sup>Maa ra Cristo chahá ra tandihí cha vaha ta cha chiñi tuñi chi yo. Tatu ñohó nuu yo chi ra Cristo, ñohó nuu yo chi Nyoo. <sup>4</sup>Catyí chi ndo tyehe caa tacuhva cha ma sandavi ñaha ñáyivi chi ndo chihin tuhun tyaqui. <sup>5</sup>Vasi ña nyaí chihin ndo, soco cohon ñiñi ndo vatyí ñohó ñiñi tuhun ndo. Ta sii cuñí nyehi chi ndo. Vatyí vaha xaan cuhva cuahán iyó ndo. Ta ñiñi xaan ñiñi ndo cuahan ndo chata ra Cristo.

<sup>6</sup>Yucuan chaha tari chinó ñiñi ndo chi noo tuhun ri maa ra Cristo quivi nañihí ndo chi ra, tyicuan caa cuñi tucu chi coo ndo ta ñin ri cuvi ndo chihin ra. <sup>7</sup>Ta cuinyaña ca ndo chi ra. Ta quihí vaha yoho ndo chihin ra. Ta sanii ca ndo ñiñi ndo chihin cha chino ñiñi ndo, tari cuhva sañaha ñu chi ndo. Ta nyita ri nacuhvá ndo tyahvi nyoo chi Nyoo.

**Ñayivi chaa cha chahá ra Cristo chi yo**

<sup>8</sup>Saha ndo cuenda vatyí iyó ñáyivi cuñi ñu sandavi ñaha ñu chi ndo chihin tuhun cha ndichí ri maa xiñi ñáyivi, tuhun cha ña ndicha. Vatyí ñima chi ra Cristo chinó ñiñi ñu cuan. Noo costumbre ri nyicón ñu cuan. Ta nyicón ñu chi cha nyacá ñaha siqui ñuhu ñayivi ihya.

<sup>9</sup>Soco cha sañahá ñu cuan, ñima cha ndicha cuví. Vatyí Nyoo ta

tandihí cha cahnu cuví ra, tandihí cuan ta nyaá chihin ra Cristo. Vatyí maa ra Cristo cuví Nyoo. <sup>10</sup>Ta cha nyaá ra Cristo chihin ndo, tyítú añima ndo chihin Nyoo. Ta ra Cristo ican ra cuví ra nuu chi tandihí ángel ta tatyí cuihna cha nyacá ñaha. <sup>11</sup>Quiví nañihí ndo chi ra Cristo, quihví ra añima ndo. Ña nduvahá ndo nuu Nyoo chihin costumbre circuncisión cha itá xaan iñi ra Israel. Maa ra Cristo sacuachiyó tandihí cha ña vaha cha tuhvá ndo sacuví. Sahá ra circuncidar añima ndo cuví cuan soco ñima chihin ndaha ra. <sup>12</sup>Quiví condutyá ndo chichi ndutyá, tari quívi chihí ndo chihin ra Cristo cuví cuan. Tyicuan ta quita ndo chichi ndutyá, tari quívi nandoto ndo chihin ra Cristo, vatyí chinó iñi ndo tyí Nyoo chihin tunyee iñi ra sanandoto ra chi ra Jesús. <sup>13</sup>Nu quichí chi ña ñohó nuu ndo chi Nyoo. Vatyí sacuví xaan ndo cuatyí. Ta cuví ndo tari noo ñáyivi chihí chihin cuatyí cuan. Ta ña sahá ñu circuncidar chi ndo. Soco vityin Nyoo sahá ra ticahnu iñi tandihí cuatyí ndo. Ta chahá ra cha coo ndo noo ñáyivi chaa chihin cha iin ri cuví ndo chihin ra Cristo. <sup>14</sup>Sanatuví ley chahnu cuan cuatyí yo. Ta catyí chi tyí tahán chi cuhun yo anyaya vatyí ña quichahá yo chi chi. Soco ley cuan Nyoo sacuachiyó ra quívi chihí ra Cristo nu cruzi. <sup>15</sup>Quiví cha chihí ra nu cruzi cuví chasaha ra chi cuihna ta chi tandihí tatyí ña vaha cha nyacá ñaha. Chihin nuu tandihí maa ángel Nyoo sacotó ra vatyí cahnu ca cuví maa ra ta ñima ca cuihna.

**Nu chahá ra Pablo tuhun tyí nanducú yo cha vaha cha chahá Nyoo**

<sup>16</sup>Yucuan chaha ña tahán chi quihí yuhu ñáyivi chi yo cha cuenda cha chachí yo o cha chihí yo, o cha cuenda cha ña naquehén vaha yo noo quívi vico. Cuví ri quívi cha natyacu yoo, o cuví ri quívi nyitatu yo. <sup>17</sup>Tandihí cuan cuví chi tari noo xiñahñu ri cha cuquichi ityí nuu. Ta vityin cha quichí ra Cristo ta ican ra cuví ra cha ndicha vaha sacacu chi yo. <sup>18</sup>Ma cuhva ndo cha casi ñáyivi nu naquehen ndo noo cha cuacuhva Nyoo chi ndo. Maa ñu ndahvi sahá ñu chi ñu soco ña ndicha ñu, ta sacahnú ñu chi ángel. Ta sahá ñu tyí ñyehe ñu cha sañaha Nyoo chi ñu. Ta cahnu sahá ñu chi ñu chihin cha chicá xiñi ñu tuhun ñáyivi ihya. <sup>19</sup>Ñu cuan ñima chi ra Cristo ra cuví xiñi nyicón ñu. Yucuan chaha nyacuví ñu tandihí cuan. Soco yoó cha nyicón yo chi ra, maa ra cuví nuu chi yo. Ta sandu iin ri ra chi yo chihin ra. Ta sacahnú ca ra chi yo chihin tunyee iñi ra tari cuhva cuñí maa Nyoo.

<sup>20</sup>Tari quívi chihí coño ñuhu cuatyí ndo chihin ra Cristo cuví cuan. Ta ña nyacá ñaha ca tuhun ñuhu ñáyivi ihya chi ndo. ¿Ñáá tuhun cha iyó ca ndo tari caa iyó ñáyivi cha ña ñohó nuu Nyoo? Ta quichahá ca ndo cha cahán ñu cha sacuví costumbre cuan. <sup>21</sup>Vatyí catyí ñu chi ndo tyehe caa: “Ma tiun ihya chihin ndahun, ma cachun ihya. Coto ma cacun”, catyí ñu. <sup>22</sup>¿Ñáá tuhun cha quichahá ca

ndo tuhun cahán ñu cuan? Vatyí maa maa ri cha ndichí xiñi ñáyivi cuví. Vatyí nyayu noo cha iin yaha ri cuví. Ma tiví ndo nuu Nyoo cha cuenda cha cachi ndo. <sup>23</sup>Ndicha vatyí costumbre ihya tari maa cha vaha cuví, cuñí maa ñáyivi. Vatyí sanyehé ñu tindocho coño ñuhu ñu. Ta cuñí ñu tyi vaha sacahnú ñu chi Nyoo tatu sacuví ñu tyicuan caa. Soco ña chaá cuan nuu Nyoo. Vatyí ma cuvi tinyaa cuan cha quiñi caa cha cuñí coño ñuhu ñu.

**3** Chahá Nyoo noo ñáyivi chaa chi yo vatyí nandoto ra Cristo. Ta vityin nyaá ra chiyo vaha Nyoo andívi. Yucuan chaha na nducu yo cha vaha cha chahá Nyoo chi yo nya andívi. <sup>2</sup>Caca xiñi ndo cha vaha cha chahá Nyoo chi yo nya andívi. Ta ma caca xaan xiñi ndo tuhun cha iyó síqui ñuhu ñáyivi ihya. <sup>3</sup>Vatyí nyoho cha yaha chihí ndo in caa ri chihin ra Cristo. Ta vityin iyó ndo iin ri chihin ra chihin Nyoo. <sup>4</sup>Ta quívi quichi tucu ra Cristo, ra chahá ñáyivi chaa cha iyó ndo, tyicuan ta cunyehe ñáyivi tyi cahnu xaan ca ra cuví maa ra. Ta cunanyehe tucu ñu chi nyoho in caa ri chihin ra. Ta cutahan tucu maa ndo quichi ndo nu tyaquí cuan chihin ra.

**Yoso caa chiyo yo costumbre nu quichi chi ta yoso caa cuñí chi coo yo chihin Nyoo vityin**

<sup>5</sup>Yucuan chaha cuñí chi cha nanducú yo cuhva na cúvi tandíhi cha quiñi caa cha quichí cuvi iñi coño ñuhu yo. Ta ni noo yo ta ma coo ri maa yo chihin ñusihi o chihin rayii. Ta ma sacuvi yo

cha ña vaha cha cuñí coño ñuhu yo, o inga cha ña vaha. Ta ma nyiyo iñi yo cha tyayii. Vatyí tari cha sacahnú yo xitohyo, o tavá xiin yo chi Nyoo cuví cuan. <sup>6</sup>Cha cuenda tandíhi cha ña vaha cuan cuxaán xaan Nyoo chihin ñu cha ña quichahá nu cahán ra. Ta cutachi tuñi ra chi ñu vatyí sacuví ñu cha ña vaha cuan. <sup>7</sup>Ta suri tyehe caa chinyacuví tucu maa ndo quívi ña ñoho nuu ndo chi Nyoo. <sup>8</sup>Soco vityin ma sacuvi ca yo tandíhi cha ña vaha cuan. Ma cuxaan ca yo. Ma cahan uhvi ca yo chi tahan yo. Ta ma cahan cuehe yo chi tahan yo. Ta ma cahan ca yo cha quiñi caa. Ma quita tuhun quiñi caa yuhu yo. <sup>9</sup>Ma ñii ca yo cuendu. Vatyí quívi ta ityi chata ca, quívi ña ñoho nuu yo chi Nyoo, tyicuan caa chinyacuví yo. Soco vityin ña nyacá ñaha ca tandíhi cuan chi yo. <sup>10</sup>Vatyí ñáyivi cha iyó yo vityin, ñáyivi chaa cuví. Noo ñáyivi chaa nanduví yo. Ta nduchaá ca yo tari cuhva caá Nyoo, ra savahá chi yo, nyacua nya cohon nuu vaha yo chi ra. <sup>11</sup>Ña niñi cha cuví yo ñu Israel, an ñu Grecia, an ñu inga ñuu. Ta ña niñi cha sacuví yo costumbre circuncisión, an cha ma sacuvi yo. Cuví ri yo noo ra chíni tuñi o cuví ri yo noo ra soho. Cuví ri yo ra iyó chitoho, o cuví ri yo ra yori nyacá ñaha chi yo, ña niñi xaan ca tuhun cuan. Niñi ca cha iin ri cuví tandíhi yo chihin ra Cristo, vatyí maa ra cuví tandíhi.

<sup>12</sup>Nyoo cuñí ra chi yo ta nacachí vaha ra chi yo vatyí cuví yo ñáyivi chi ra. Yucuan chaha na coo yo ñáyivi chaa tari tahán chi coo ñu yihí cuenda ra. Na cundahvi cuñi

yo nyehé yo chi tahan yo. Na cuvi yo ñáyivi vaha. Ndahvi saha yo chi yo. Na cumasu iñi yo. Cũnyee yo tandihi tisihi tindoho chihin cha sii cuñi yo. <sup>13</sup>Na cucama iñi yo chihin noo noo tahan yo. Ta saha yo ticahnu iñi chi tahan yo tatu ñáa cha sacuví ñu chi yo. Tari sahá ra Cristo ticahnu iñi chi yo, tyicuan caa cuñi chi cha sacuví tucu maa yo. <sup>14</sup>Ta siin ri cuñi yo chi tahan yo. Ta nducu yo cuhva coo vaha yo chihin ñu. Vatyí ican cuan cuví cha sacu iin ri chi yo. Ta ican cuan cuví cha niñi ca. <sup>15</sup>Ta cha taxi maa Nyoo na coo añaima yo. Vatyí ra Cristo nyacá ñaha chi yo. Nyoo nacana ra chi yo vatyí tacuhva iin ri cuví yo cuenda ra Cristo. Ta tyicuan ri nacuhva yo tyahvi nyoo chi ra cha cuenda ihya.

<sup>16</sup>Ta tuhun ra Cristo na sacutu añaima yo. Sañaha ca yo tuhun ra chi tahan yo. Ta sanii ca yo iñi tahan yo chihin cha chiñi tuñi Nyoo. Saçahnu yo chi Nyoo chihin cha cata yo yaa, o salmo. Ta çata yo yaa cha chahá maa Tatyí Ii Nyoo chi yo chihin cha niñi añaima yo. Ta tyicuan ri nacuhva yo tyahvi nyoo chi Nyoo. <sup>17</sup>Tatu ñáa tyiño sahá yo, o ñáa tuhun cahán yo, sacuvi yo soco tari cha tyi tyiño maa Sutu Mañi yo Jesús sacuví yo. Ta nacuhva yo tyahvi nyoo chi Nyoo cha cuenda maa ra Cristo.

**Chahá ra Pablo tuhun yoso  
caa nducú yo cuhva coo  
vaha yo chihin ñáyivi**

<sup>18</sup>Nyoho cha iyó yii ndo, cuhva ndo cha cunyaca ñaha yii ndo chi ndo. Vatyí yucuan cuhva tahán chi

coo ndo, vatyí yihí ndo cuenda Sutu Mañi yo. <sup>19</sup>Ta nyoho rayii, cuñi ndo chi ñasihí ndo. Ta ma nduxaan ndo chi ña. <sup>20</sup>Nyoho cha cuví ndo sehe quichaha ndo chi sutu ndo ta chi sihi ndo. Vatyí yucuan cuhva cuñi maa Sutu Mañi yo. <sup>21</sup>Nyoho cha cuví ndo sutu ta sihi, ma cahan xaan ndo chi sehe ndo, vatyí coto nducuihya iñi chi. <sup>22</sup>Ta nyoho cha cuví ndo musu, quichaha ndo chi chitoho ndo. Ñima cuhva cha nyehé ri ra chi ndo quichaha ndo chi ra, tacuhva vatyí vaha cuñi ra nyehe ra chi ndo. Soco sacuvi ndo chihin cha tandihi añaima ndo. Vasi ña nyehé ra. Vatyí Nyoo nyehé ra chi ndo.

<sup>23</sup>Tandihí ri tyiño sacuví yo, sacuvi yo chihin cha niñi iñi yo. Saha yo tuhun tyi tyiño nuu maa Sutu Mañi yo sacuví yo. Ta ñima maa ri maa tyiño nuu ñáyivi. <sup>24</sup>Vatyí chitó yo vatyí maa Sutu Mañi yo cucuhva ra noo cha tahán chi chi yo vatyí sacuví yo tyiño nuu ra Cristo. Vatyí ican maa ra cuví chitoho yo cha ndicha vaha. <sup>25</sup>Soco tatu sacuví yo cha ña vaha, Nyoo cutachi tuñi ra chi yo cha cuenda cha ña vaha cha sacuví yo. Ta tandihí yo iin ri ñáyivi cuví yo nuu ra. Vatyí Nyoo ña cachi ra ñáyivi cuñi ra.

**4** Nyoho cha iyó musu ndo, cuñi chi tyi vaha ñáyivi cuví ndo chihin musu ndo. Niçohon iñi ndo vatyí iyó tucu noo chitoho maa ndo nya andivi. Ta maa ra nyehé ra chi ndo.

<sup>2</sup>Ta tyicuan ri çacan tahvi ndo chihin cha niñi iñi ndo. Ta nacuhva yo tyahvi nyoo chi Nyoo cha cuenda tandihí maa. <sup>3</sup>Çacan tahvi ndo chaha ndi, vatyí nanuña ca

Sutu Mañi yo xiñi ñáyivi ta tyasoho ñu tuhun ra Cristo cha cahán ndi nuu ñu. Vatyí tari noo tuhun xehe cuví tuhun ra Cristo chi ñu, vatyí ña chitó ñu tyi ican ra cuví ra sacacú chi yo. Ta cha catyi tuhun ihya ñohí vehe caa. <sup>4</sup>Cacán tahvi ndo chahi tacuhva cuví sañahí chi ñu yoso cuhva cuví cutuñi vaha iñi ñu tuhun ra Cristo, tari cuhva tahán chi tyi sacuví.

<sup>5</sup>Cachi coo ndo chihin ñu ña ñohó nuu chi Nyoo. Vatyí tyicuan caa ta cuví cahan ndo tuhun Nyoo chihin ñu. <sup>6</sup>Cuñí chi vatyí ndatuhún yo maa maa ri cha vaha, ta cha cachi, (ta cha tahán iñi ñáyivi) tari tahán chi cunyacuvi yo cha yihí yo cuenda ra Cristo. Tyicuan ta cuví coto yo yoso caa cunacahan yo tatu ñáá noo tuhun ndacá tuhun ñu chi yo.

**Nu sacuhún ra Pablo nocumi chi ñu ñuu Colosas cha yihí cuenda Nyoo**

<sup>7</sup>Ra Tíquico, yañi yo, ra sahá tyiño tyiño Sutu Mañi yo chihin, maa ra cunacatyí ra chi ndo yoso caa cuahán nyaí. <sup>8</sup>Yucuan chaha tachí chi ra nu nyicu ndo vatyí nacatyí ra chi ndo yoso caa nyicú ndí. Ta sanduní ca ra iñi ndo. <sup>9</sup>Ta chihin ra Tíquico vachi tucu ra Onésimo, yañi yo. Ta ñi iñi ra. Ta cuñí yo chi ra. Cuví ra noo ra ñuu ndo. Maa ra cucanacatyí ra chi ndo tandihí cha cuví nu nyaí.

<sup>10</sup>Ra Aristarco, ra tahin cha ñohó ndí vehe caa, saquichí ra nocumi chi ndo. Ta saquichí tucu ra Marcos, yañi cunducatyí ra Bernabé, nocumi chi ndo. Ta cha sacote chi ndo tuhun ra Marcos. Tatu chaa

ra nu nyicu ndo, vaha cahan ndo chihin ra. <sup>11</sup>Vachi tucu nocumi chi ndo sahá ra Jesús, ra cha ñañi tucu Justo. Ta chichi cha tandihí ñu Israel cha yihí cuenda Nyoo, uñi tahan ri ra ihya sahá tyiño ra tuhun Nyoo chihin. Ta nduní xaan ca iñi sahá ra. <sup>12</sup>Vachi tucu nocumi chi ndo sahá ra Epafras, ra ñuu ndo. Ta maa ra sacuví ra tyiño nuu ra Cristo. Tyicuan ri chicán tahvi ra chaha ndo chi Nyoo tyi nacaca vaha ndo chihin Nyoo. Nacuhva cuenda vaha ndo chi ndo chi Nyoo tacuhva cuví sacuvi ndo cuhva cuñí ra. <sup>13</sup>Ta yuhu cuví cha ndaa vatyí ra Epafras chicán tahvi xaan ra cuenda ndo, ta cuenda ñu cha nyicu nya ñuu Laodicea ta ñuu Hierápolis. <sup>14</sup>Vachi tucu nocumi chi ndo sahá ra Lucas, ra cha cuví doctor cha cuñí xaan yo chi. Ta vachi tucu nocumi chi ndo sahá ra Demas ñandihí.

<sup>15</sup>Cuhva ndo nocumi chi yañi yo ta tahan yo cha nyicu ñuu Laodicea. Ta cuhva ndo nocumi chi cu Ninfas ta chi tandihí ñu yihí cuenda Nyoo cha ndu iñ ri vehe ña. <sup>16</sup>Tatu yaha sacuaha ndo carta ihya, ta sacuhun ndo nu canyicu ñu yihí cuenda Nyoo nya Laodicea na sacuaha tucu maa ñu. Ta sacuaha tucu maa ndo carta cha sacuhin chi ñu Laodicea. <sup>17</sup>Çatyí ndo chi ra Arquipo vatyí na sacuvi vaha ra tyiño cha chahá Sutu Mañi yo chi ra tyi sacuví ra.

<sup>18</sup>Yuhu ra Pablo saquichí nocumi ihya chi ndo. Ta ma naa iñi ndo cha ñohí vehe caa. Ta Nyoo na nasoco ra chi ndo. Ta na cuví chi tyicuan caa.